

cisque; docentibus æquè ac discentibus, (salvâ tamen ubivis Ecclesiæ & Sedis apostolicæ autoritate) injungendum duximus, prout præsentium tenore injungimus: mandantes promotori nostro, ut sedulò advigilet, ne quisquam hanc ordinationem nostram, ausu temerario, ullo umquam tempore aut loco infringere præsumat.

Datum Lovanii 24 Maii 1790, sub Sigillo Rectorali & signaturâ secretarii nostri.

De mandato Dominorum meorum.

Locus (+) Sigilli,

Erat signatum J. F. Lints Secret.

Declaratio S. Facultatis theologicæ Lovaniensis.

Decanus & Facultas theologica studii generalis oppidi Lovaniensis, omnibus has visuris salutem in Domino.

Jam anni aliquot elapsi sunt, ex quo scholæ nostræ doctrina, tametsi majorum nostrorum placitis & Ecclesiæ sanctionibus planè consentiret (neque enim per hos annos in aliquâ doctrinæ parte nos Lovanii innovasse, a quopiam objectum fuit) illis, qui Austriacæ Domûs nomine Belgium moderabantur, non modò displicere; verùm etiam paulatim subrui cæpit: objectis identidem impedimentis, quò minùs liberè, quæ sentiremus ipsi, quæque a majoribus acceperamus, Belgicæ juventuti traderemus.

Quamvis autem vulgò notum esset, Facultatem nostram graviter sanè ferre eam, in quam redigebatur servitutem; nostris tamen querelis insuper habitis, non modò jugum aggravatum fuit, sed & aliæ ex aliis novitates irrepserè, quæ a Germaniæ oris hùc invectæ, erroris jam non dissimulandi, quin & schismatis periculum haud dubiè jubebant præsagire.

Catholica demùm res in apertum discrimen adducta & apud Belgas pænè desperata visa fuit, cùm cathedrâ & loco, maximam partem, disturbatis collegiî nostri magistris, novisque adscitis, seu, veriùs intrusis seminarii-generalis professoribus, totius tandem